

**NATIONAL ASSEMBLY OF
SEYCHELLES**

Friday 12th November, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour tou nou piblik ki pe swiv nou. Byenveni pou nou travay ozordi. Nou'n rankontre pou komans travay lo Bidze 2022, ofisyelman koni koman *Appropriation Bill, 2022*.

Nou a komanse par apel Minis, silvouple Madanm raporter.

Bonzour Minis e byenveni dan Lasanble avek nou ozordi. Nou a komans nou travay avek Mosyon pou *Second Reading of the Appropriation Bill, 2022*. Onorab Georges, *Leader* Biznes Gouvernman.

HON BERNARD GEORGES

Mersi Mr Speaker. Bonzour Mr Speaker. Bonzour Minis. Bonzour tou bann koleg Onorab e tou bann dimoun ki pe swiv nou bomaten.

Mr Speaker, anba *Order* 69(2) mon *move* ki *the*

Appropriation Bill, 2022 i ganny lir en Dezyenm Fwa. Mersi.

MR SPEAKER

Mersi. Mon a ganny segonnman? Onorab Arissol.

HON SANDY ARISSOL

Mersi Mr Speaker. Bonzour Minis. Bonzour tou Manm Lasanble Nasyonal, tou dimoun a lekout. Mr Speaker, mon ti a kontan segonn Mosyon propoze par Onorab Georges. Mersi.

MR SPEAKER

Mersi pou segonnman Onorab Arissol. Minis nou envit ou pou prezant ou diskour lentrodiksyon *Appropriation Bill, 2022*.

MINISTER NAADIR HASSAN

Mr Speaker,
Onorab *Leader*
Lopozisyon,
Onorab *Leader* Zafer
Gouvernman.
Manm Onorab,
Ser e Frer pep Seselwa.

1. Lentrodiksyon

Mr Speaker lannen 2021, in reste enn bann peryod pli difisil dan listwar nou pei. Pandemik *COVID-19* pe kontinyen ravaz lemonn, e Sesel pa'n ganny eparnye. Son

reperkisyon lo nou lekonomi pe kontinyen. Parey mon ti eksplike dan Diskour Bidze 2021, e a plizyer repriz dan Lasanble, priyorite Gouvernman an 2021 sete pou stabiliz nou sityasyon finansyel e lekonomi. Mon ti'n dekrir nou sityasyon konman grav e kritik. E alors ti pou pran en travay difisil pou stabiliz nou sityasyon e anpes nou pei koule.

Pandan sa plizyer mwan ki'n swiv, bann *staff* Minister Finans ek Labank Santral in travay vreman dir pou ede kapab vin avek en plan pou sov nou pei. Tar an Zilyet, Sesel ti reisir agree en program ek Fon Monnetier Enternasyonal (*IMF*), pour en program reform ki ti osi enkli finansman, pou ed nou dan sa moman difisil. Sa program reform pe met nou lo en bon semen.

Mr Speaker, me avan mon al lo Bidze 2022, mon oule fer en kontrandi sityasyon finansyel nou pei depi ki mon ti prezant Bidze 2021, ziska la. Pou fasilite konprenezon e pour ki napa okenn konfizyon, Mr Speaker, mon pou liste nou sityasyon finansyel, kot nou ti été, e progre ki'n annan ziska la, dan en fason pli senp posib.

Premyerman, zot ava rapel ki ti le 16 Fevriye 2021 ki

mon ti delivre mon premye Diskour Bidze. Alor pandan sa letan, sityasyon finansyel nou pei konmansman lannen ti *comme* swivan :

- Pandan sa premye 3 mwan lannen, ti annan zis 6,785 touris ki ti antre Sesel.

- Pandan sa menm peryod, deviz ki ti pas atraver nou sistenm banker ek biro lesanz ti zis 118 milyon Dolar.

- Pandan sa premye 3 mwan, an mwayenn en Dolar ti pe kout R21.50.

- Pandan sa premye 3 mwan, Gouvernman atraver Komisyon Reveni ti kolekte zis R1.4 bilyon an term taks.

- Nou balans defisit primer fiskal pour lannen ti'n prevwar pou 11.8 pousan nou *GDP*.

- Kont Gouvernman avek Labank Santral le 14 Zanvye 2021 ti dan defisit R152.7 milyon.

- Nou krwasans ekonomik ti'n ganny prevwar pou agrandi par zis 2.08 pousan.

Sa sityasyon ki sa ladministrasyon ti'n erite Mr Speaker. Ti enn tre, tre trakasan.

Depans ek reveni ki nou ti pe anmase pa ti balanse. Nou depans ti bokou plis ki nou reveni. E mon menm kapab al pli lwen pou dir ki sityasyon

finansyel nou pei ti dan swen entansif. Sa, i pa en egzazerasyon, me sete la realite.

Alor Mr Speaker, se dan sa konteks ki sa ladministrasyon ti bezwen etabli son priyorite pour sa premye lannen bidzeter. Aksyon ti bezwen ganny pran. Bann aksyon ki pa ti fasil pou pran, me ti nesese si nou ti pou konmans konble sa trou ki nou ti'n anfans ladan.

2. Obzektif Gouvernman Pour Lannen 2021

Ki ti obzektif priyorite sa ladministrasyon pandan sa en an? Sa, ti pou stabiliz nou lekonomi e fer nou det vin pli soutenab. Sete sa, nou target pandan 2021, parey mon ti fer resorti dan mon Diskour Bidze. Alor eski nou pe atenn sa lobzektif?

La ankor mon pou liste bann sif ofisyel pli resan pou montre sa progresyon ki'n annan.

- A lafen mwan Oktob, ti annan en total 133,966 touris ki ti'n antre Sesel - en ogmantasyon remarkab e nou prozeksyon pou lafen 2021 i 162,391 viziter.

- Pandan zis peryod Avril ziska Oktob, deviz ki ti pas atraver nou sistenm banker e

biro lesanz ti'n mont lo en nivo sibstansyel pou ariv *USD* 366 milyon.

- An mwayenn, en Dolar in desann pou ariv R15.

- A lafen Septanm 2021, Gouvernman atraver *SRC* ti'n kolekte R4.8 bilyon, an term taks.

- Nou defisit primer fiskal pour lannen in aprezan prevwar pou 6.6 poursan nou *GDP*.

- Nou krwasans ekonomik in aprezan ganny prevwar pou agrandi par 6.1 poursan.

Ozordi, mon kapab deklare ki sa parkour pli difisil i deryer nou e nou lekonomi e sityasyon finansyel in stabilize e nou'n komans lo sa long larout pou re konstrir nou pei.

Mr Speaker, nou'n sorti vremen lwen. E zisteman, apre son premye *review* anba sa program *EFF* ki'n terminen Lendi le 8 Novanm, Sef Misyon Fon Monneter Enternasyonal (*IMF*) in dir ki i tre enpresyonnen lo performans lekonomi pei ziska prezan.

Me parey mon'n dir, kanmenm nou'n amelyor en kantite nou lekonomi pa ankor rekipere 100 poursan e keksoz pa ankor retourn normal. I reste bokou pou fer.

Mon apresye ki bokou Seselwa in ekout mon lapel pou

linite nasyonal e travay ansanm pour benefis nou pei. I sa rezon ki nou'n kapab sirviv sa moman difisil. E la ankor, mon pou lans en nouvo lapel pou nou kontinyen ini ansanm pou rekonstrir nou pei.

An menm tan annou pa bliye ki okenn enstabilite politik ek sosyal i kapab annan reperkisyon serye lo nou lekonomi. Mon lans en lapel pour tou antite politik, Linyon Travayer ek lezot pou gard stabilite dan pei. Akoz si i annan enstabilite dan nou pei se Sesel ek Seselwa ki pou soufer. Annou pa fer sa fot.

3. Devlopman lo nivo mondyal e son lenplikasyon

Mr Speaker, ozordi sityasyon lekonomi mondyal i ankor annan bokou lensertitid ek defi. Dan bokou parti lemond pandemik *COVID-19* pa ankor ganny met anba kontrol e bokou pei pa ankor kapab atenn zot lobzektif vaksinasyon. Anmezir ki aktivite ekonomik lo nivo mondyal i repran, nivo lenflasyon pe osi ogmante. An se moman pri komodite i pli o ki i ti ete an 2020 e i ekspekte reste o an 2022.

Statistik i montre ki abilite pou zwenn nivo demann pour bann komodite i en faktor kle ki

pe kontribye pou ogmant nivo pri. Logmantasyon dan nivo demann an rezilta aktivite ekonomik ki'n repran bokou pli vit ki ti'n antisipe, in fer ki in annan en dekalaz ant nivo demann pour bann prodwi e lakantite ki kapab ganny fourni dan kour term.

Letan pandemi *COVID-19* ti konmans afekte lemond bokou biznes ti koup lakantite prodwi e servis. Sa in fer ki serten biznes pa ti'n prepare pour logmantasyon dan nivo demann letan aktivite ekonomik ti konmans repran an 2021.

An plis ki sa, distribisyon bann *container* ki servi pour transportasyon maritim in osi ganny afekte atraver lemond akoz bann *container* vid ki ti'n pri dan bann diferan por.

Sesel in osi ganny enpakte par retar ki'n annan dan transportasyon maritim, swivan sanzman dan lafason ki komers i ganny fer atraver lemond e abilite bann lakonpanyen bato pou zer lakantite kargo ki annan pour transporte, kot in annan en mank serten komodite lokalman. Laplipar analis i krwar ki bann tel sityasyon pou persiste pou ankor en pe letan.

Lo size pri karbiran, an 2020 pri an mwayenn ti 42

Dolar Ameriken par barik konpare avek Novanm 2021, ki 82 Dolar Ameriken par barik. En sif ki 95 poursan pli o ki an 2020. Sepandan, pri karbiran i ekspekte redwir an 2022 pou kout an mwayenn 72 Dolar Ameriken en barik, an vi logmantasyon ki'n prevwar lo nivo prodiksyon.

Logmantasyon ki'n arive dan pri komodite e kou transportasyon in fer ki pri in ogmante lokalman an 2021. Me, avek bann faktor ki'n stabilize nou ekspekte ki to lenflasyon an 2022 i stabilize a en to apepre 3poursan malgre ki pri i reste eleve.

Avek sityasyon ki endike ki pou annan presyon lo pri, Gouvernman pe al komans en legzersis pou revwar bann alokasyon '*weights*' pour lasistans sosyal pou bann ki lo pli ba saler. An menm tan STC pou kontinyen rod plis lefikasite dan son loperasyon e son sistenm prokirman, pou asire ki napa okenn logmantasyon lo bann marsandiz debaz.

Mr Speaker, pli tar dan Ladres Bidze nou pou donn en pe plis detay lo travay ki STC pe fer ziska prezan.

4. Revi lo Performans Ekonomik e Konteks Lekonomi pour 2022

Mr Speaker, lannen 2020 ti en lannen ranpli ek defi pour Sesel. Avek pandemik COVID-19, bann defayans sosyoekonomik dan nou pei ti entansifye e an menm tan komers mondyal ti ganny enpakte avek bann nouvo defi. Annefe, sa kontraksyon ekonomik 9.9poursan an 2020, i pli gro ki'n deza rikorde. Pou azoute, an rezilta bann Polisi ki ti ganny enplimante det Gouvernman ti sorti 58 poursan pou ariv 92.2 poursan GDP.

An 2021, pandemik COVID-19 ek son lefe i ankor la. I en lannen kot nou napa bokou swa, me pou anmenn lekonomi lo en semen pli soutenab e an plis aplik bann lesan lefase pour en lavenir pli meyer pour Sesel.

Alors, avek sa nouvo realite e bann defi devan nou, nou pa kapab inyor sa lefe ki nivo det pou annan lo nou fitir zenerasyon. Se pour sa rezon ki i neser pou enplimant bann Polisi, ki pa zis anmenn en lekonomi pli diversifye, me osi en lekonomi rezilyan e soutenab.

Pou realiz sa transformasyon, nou bezwen en servis piblik pli modern e pli efikas. Pou met li dan en langaz pli senp, nou bezwen fer plis ek mwens, e sa bann desizyon difisil devan nou pou enpakte nou pou plizyer zenerasyon. Sa i nou nouvo realite e sa i defi ki nou bezwen fer fas avek e sirmonte koman en pei.

Mr Speaker, pour lannen 2022 nou lekonomi pou kontinyen eksperyans krwasans pozitiv. Avek en lekonomi ki ti kontrakte par 9.9 poursan an 2020, nou pe prozekte en krwasans pozitiv an 2021 pou vin 6.1 poursan. Pour lannen 2022, krwasans lekonomi i ekspekte ariv 7.2 poursan.

Nou'n vwar en gran amelyorasyon dan Sekter Tourizm pour lannen 2021 konpare avek 2020. Dan trwazyenm kar 2021, nou'n rikord en larive 4,285 touris en mwayenn par semenn, konpare avek en mwayenn 443 touris par semenn dan premye kar 2020.

A la fen Oktob 2021, kantite viziter ki'n antre Sesel i 133,966, ki montre en logmantasyon par 33 poursan konpare avek menm peryod an 2020.

Bann marse ki pe kontribye se Larisi, Izrael, e UAE. Alors, nou pe estimen ki Sekter Akomodasyon ek manze e osi Sekter Ladministrativ, pou annan en krwasans 46 poursan e 36 poursan respektivman an 2022. Sekter Transportasyon e stokaz ki osi relye avek Sekter Tourizm, atraver bann vol e larive bann bato, i estimen pou ogmante par 24 poursan.

Nou pe ekspekte en krwasans dan Sekter Lenformasyon ek Telekomunikasyon par 7 poursan. Sekter Lagrikiltir ek Sekter Lapes pe ekspekte grandir par 3 poursan an 2022. Sa i apre bann nouvo Polisi ki Gouvernman pe met an plas pou annan plis prodiksyon lokal.

Nou pe ekspekte plis aktivite konstruksyon an 2022, alors nou pe prozekte en krwasans 6 poursan. Dan Sekter Delo ek Elektrisite, nou pe prozekte en krwasans 2 poursan e 3 poursan respektivman an 2022. Sekter Distribisyon e *retail* pe ekspekte en krwasans 3 poursan. Sekter Finansyel ek Lasirans pou annan en krwasans 5 poursan parey an 2021.

5. Bilan Performans Fiskal 2021

Mr Speaker, kot i konsern nou performans bidzeter ki nou pe prozekte pour lafen 2021, Gouvernman i ekspekte en defisit primer 6.6 poursan *GDP*. Sa, i ekivalan en defisit primer R1.6 bilyon konpare avek en defisit primer R2.6 bilyon dan Bidze orizinal pou lannen 2021.

A lafen 2021, nou reveni total ekskli don, i 6.4 poursan ouswa R453 milyon pli o ki dan nou Bidze ki nou ti prevwar pour 2021, pou ariv R7.5 bilyon konpare avek R7.1 bilyon.

Nou revizyon an se ki konsern depans total pou 2021, i R10.4 bilyon konpare avek R11.7 bilyon ki ti'n prevwar dan Bidze 2021 lo komansman lannen.

E Mr Speaker, zot ava rapel ki an Septanm nou'n vin dan Lasanble Nasyonal pou demann en Bidze siplemanter R303.9 milyon. Me, osi nou ti prezant en rediksyon dan Bidze pour en total R1.4 bilyon.

6. Bidze 2022 e Performans Fiskal Mwayen Term

Mr Speaker, pour lannen 2021 Lasanble ti aprouv depans pour lavalier R11,013,648,296. E osi revi Bidze 2021 ti annan en rediksyon R1,125,511,765.

Alors, selman en total R9, 888,136,525 ki pou ganny depanse pandan lannen 2021. Pour lannen fiskal 2022, nou pe propoz en depans **R10,091,651,146**. Nou pe osi prozekte pou kolekte R9.7bilyon reveni ek bann don.

Mr Speaker, menm si nou depans in ogmante par R203.5 milyon ouswa 2.1 poursan, letan ou konpar revi Bidze 2021 avek Bidze ki pe ganny propoze pou lannen 2022, nou pe prevwar en balans defisit fiskal primer R222.1 milyon ouswa 0.8 poursan *GDP* pour lannen 2022. konpare avek en balans defisit fiskal primer R1.6 bilyon ouswa 6.6 poursan krwasans Domestik Brit pour revi Bidze 2021.

A lafen lannen 2020, nou stok det ti'n ariv 92.2 poursan prodwi Domestik Brit. Nou ekspekte pou fini lannen 2021 avek en stok det lavalier 81 poursan *GDP*.

Mr Speaker, avek sa defisit bidzeter ki'n redwir pour lannen 2022, nou ekspekte nou stok det redwir pou ariv 76 poursan *GDP* a lafen 2022. Nou osi pe prozekte ki nou pou konmans en sirplis bidzeter konmansman lannen 2023. Avek sa sirplis bidzeter konmansman 2023, nou pe prevwar ki nou stok det i ariv

anba 70 poursan *GDP* par lafen 2023.

7. Koleksyon Reveni pour lannen 2022

Mr Speaker, pour lannen 2022 nou pe ekspekte kolekte en total R7.86 bilyon reveni *tax* konpare avek R6.69 bilyon dan Bidze revize pour 2021. Sa logmantasyon i prensipalman asosye avek krwasans dan Sektor Tourizm konpare avek 2021.

Koleksyon lezot reveni ki pa taks pour lannen 2022, pe ganny bidzete pour en total R1.07 bilyon konpare avek R822.1 milyon an 2021. Pli gro ogmantasyon i koleksyon reveni dan '*dividend*' sorti kot nou bann lantrepriz piblik ki'n ogmante sorti R375.3milyon pou ariv R590.3milyon.

Koleksyon reveni an term don ki nou resevwar avek bann partner aletranze, pou ogmante sorti R605.9milyon an 2021 pou ariv R782.1milyon an 2022. Rezon prensipal, i bann proze ki pa ti materialize an 2021 aköz pandemik *COVID-19*.

8. Konteks Bidze 2022

Alors Mr Speaker, pou sa Bidze 2022, lobzektif prensipal se pou

nou kontinyen met det Gouvernman a en nivo pli soutenab. Nou priorite se pou konsolid depans Gouvernman e anmenn plis lefikasite dan servis piblik. Nou osi pou kontinyen travay avek Komisyon Reveni pou moderniz sistenm ki zot servi pour nou vwar plis lefikasite dan koleksyon reveni.

Mr Speaker, *SRC* in ganny en alokasyon R231.6 milyon an 2022 konpare avek R137.2milyon dan Bidze revize an 2021. Apard bann nouvo sistenm ki pou moderniz *SRC*, nou pe travay avek bann partner enternasyonal pour nou ganny bann eksper dan Ladwann ek dan taks odit pou asiste *SRC* e donn formasyon bann travayer.

Anliny avek deklarasyon dan Bidze 2021, Gouvernman pou kontinyen travay avek sa 5 sektor pou fer sir ki nou anmenn plis krwasans dan sa bann sektor pandan mwayen term. Sa i:

- i. Sektor Tourizm
- ii. Sektor Lagrikiltir
- iii. Sektor Lapes e Lekonomi Ble
- iv. Sektor '*Digital Economy*' e
- v. Sektor Finansyel.

9.1. Labaz Depans Gouvernman

9.1.1. Reminerasyon e Saler

Mr Speaker, Bidze pour saler an 2022 i reprezant en total R3.1 bilyon ouswa 11.2 pousan *GDP* ki'n ganny prevwar. Sa sif i en amelyorasyon letan ou konpar li avek Bidze 2021, kot saler ti reprezant 12.5 pousan *GDP*. Stratezi, se pou asire ki Bidze saler i reste soutenab mwayen term ki devret la valer 11 pousan *GDP*.

A parti Oktob 2021, ti annan 10,849 travayer dan sekter piblik. Dan prozeksyon Bidze 2022, nou osi pe limit rekritman. Sepandan i annan 426 pos pou ranplas travayer ki'n kite dan Gouvernman, 223 pos ki dan Bidze 2021 ki bann antite pa ankor fer rekritman e 84 nouvo pos pour lannen 2022. Alors en total, 733 pos ki bann Minister, Departman e Lazans i kapab fer rekritman, pour en total R 215.8 milyon.

Pour lannen 2022 parey 2021, pou napa ogmantasyon dan saler pour bann travayer servis piblik e osi pou napa logmantasyon dan *allowance* pour 'long service.' Bann travayer ki lo kontra pou napa

ogmantasyon ler zot konplet zot kontra.

Mr Speaker, mon konnen i annan bokou lekspektasyon ek sekter piblik e tou travayer pe ekspekte en logmantasyon saler avek to lenflasyon ki'n monte. Me, bann risk advers i ankor la dan lekonomi, alors mon demann travayer dan sekter piblik pou annan en pe pasyans.

I priyorite Gouvernman pou anmenn nou Bidze lo en semen ki donn nou en sirplis, e sa i a osi donn nou kapasite pou donn en logmantasyon lo saler, sirtou pour bann ki lo saler pli ba.

Gouvernman pe travay lo en nouvo striktir saler pour Sekter Piblik e nou ekspekte servi sa nouvo lankadremman pour Bidze 2023. Premye travay ki nou pou fer, se nou pe konsolid bann *allowance fix* dan saler de baz.

An se moman lakantite *Scheme* servis piblik ek *allowance* ki egziste i kree bokou dezord. Sa linisyativ pou enkorpor tou *allowance* dan saler, i a osi ed travayer akse *loan* pli fasilman, an vi ki labank pa pran kont *allowance* ler zot pe konsider aplikasyon *loan*.

Mr Speaker, pli tar dan mon diskour mon pou

mansyonn en nouvo lankadremman ki baze lo rezilta e performans dan servis piblik. Ozordi i annan bokou *Scheme* ki ganny donnen parey gratwite, peyman letan en travayer i fini kontra, e dan lepase en trezyenm mwan saler. Sa bann *Scheme* i kout anviron R242 milyon par lannen.

Mr Speaker, nou pe travay lo en lankadremman ki travayer i kapab ganny peye lo son performans a lafen lannen, dapre son target ki in agree lo la, dan sa nouvo striktir saler dan Gouvernman. Nou ekspekte konplet sa travay an 2022 e osi fer konsiltasyon ek travayer dan sa peryod.

9.1.2. Byen e Servis

Mr Speaker, en alokasyon Bidze R3.03 bilyon ouswa 10.9 poursan *GDP* in ganny prevwar pour lannen 2022 pou byen ek servis. Sa sonm i konparab avek lannen 2021, ki ti 12.3 poursan *GDP*. Nou bezwen travay avek bann Sekter pou annan plis lefikasite dan depans byen e servis. Sa i ava ed nou met plis Bidze dan program lenvestisman kapital. Nou bezwen travay plis avek mwens.

Pour lannen 2022, nou pou travay ek Sekter

Ledikasyon ek Sekter Lasante pou fer en revi lo zot bann depans pou vwar si nou pa kapab ganny plis lefikasite dan sa 2 sekter. Sa 2 sekter i reprezant en total R967.5 milyon ouswa 32 poursan Bidze total byen e servis.

Minister Lasante pe kontinyen resevwar en poursantaz enportan dan Bidze Nasyonal. Lannen 2022, Sekter Lasante pe resevwar R579.9 milyon anba byen e servis, ouswa 19 poursan total Bidze byen e servis.

Gouvernman i rekonnet ki lenvestisman dan lasante nou Nasyon i osi en lenvestisman enportan dan devlopman sa Nasyon e lavenir lepep, aköz en pep ki an bonn sante i en pep ki kapab prodwir travayer fyab pou fer marse lekonomi e permet Nasyon epanouir lo son maksimonm potansyel.

Pandemic COVID-19 in montre nou ki letan nou koz lo lasante, nou bezwen dabor koz lo prevansyon e devlopman kapasite imen. Prevansyon i touzour meyer ki gerizon.

Atraver en nouvo '*package* swen lasante primer' ki Minister Lasante in striktire e pe met an plas, plis lanfaz pe aprezan mete lo prevansyon dan tou son dimansyon e devlopman kapasite imen, pour fer ki a

lafen dizour i annan bokou mwens dimoun ki annan bann faktor de risk pour bann maladi non-transmisib.

Mwens dimoun ki abiz sibstans, tel ki drog, lalkol ek sigaret e bokou plis dimoun ki fizikman aktiv e ki konsonm manze ki bon pour lasante. Sa i labaz e sa baz i bezwen bokou pli solid ki i ete la konmela.

Bann programm prevansyon Minister Lasante pou bezwen entansifye dan lekol, dan lafanmir e dan lakominote, pour fer ki avek letan i annan mwens dimoun ki ganny dyabet, tansyon, konplikasyon maladi ronnyon, maladi kardyovaskiler ek kanser. Se zisteman sa group maladi ki elev Bidze lasante touzour pli o.

Ozordi Mr Speaker, programm dyaliz pe kout par lao 10 poursan Bidze total Minister Lasante. Minister Lasante pou bezwen adres sa size, non selman atraver prevansyon me osi atraver lezot mezir efikasite ki i pou bezwen pran. Sa kontra ki ladministrasyon avan ti sinyen avek en lakonpanyen prive i ankor pe kout Gouvernman tro bokou larzan.

Alor, dan travay pou evalye performans sa bann depans dan Lazans Swen

Lasante nou pou bezwen regard sa bann depans swivan ;

- i. *Medicine* - R35.2milyon.
- ii. *Supplies Laboratwar* - R31.1 milyon.
- iii. *Haemodialysis* - R55.9 milyon.
- iv. *Supplies Medikal* - R65 milyon.
- v. *Supplies Manze pour bann pasyan* - R27.4 milyon.
- vi. *Tretman Medikal spesyalize* - R70 milyon.

Mr Speaker, nou pou entansifye nou zefor lo reform e lefikasite dan lankadremman '*public procurement.*' Parey mon ti anonse dan Ladres Bidze 2021, nou pe revwar Lalwa *Public Procurement.* Sa legzersis pe pran en pe plis letan e nou ekspekte konplet sa travay an 2022.

Sepandan, nou pou bezwen vin avek serten lamannman ki ava ede pou senplifye prosedir e osi ganny plis valer pour depans Gouvernman. Mr Speaker, ozordi Lalwa pa permet Gouvernman negosye lo pri avek sa antite ki'n ganny swazir pou donn sa byen ou servis. Sa prosedir negosyasyon i egziste ozordi dan sekter prive me dan sekter piblik nou bezwen fer li

dan en fason transparan. Nou bezwen vwar fason ki mannyer nou kapab fer plis *savings*, me prenon kont nou bezwen fer sir nou mentenir bann prensip latransparans dan prokirman.

Pou lafen 2021, nou ekspekte en rapor konpreansif ki pe fer par en konsiltan endepandan lo servis sekirite. Baze lo sa rapor, Gouvernman pou travay lo prosedir prokirman pou servis sekirite.

Gouvernman in osi konmans revwar prosedir lo bann *tender* netwayaz e nou ekspekte konplet sa travay dan premye kar 2022.

Mr Speaker, dan Bidze 2022 nou'n fer en alokasyon R69.9 milyon pou *Cleaners Corporative* pou donn servis netwayaz pou bann lofis Gouvernman.

Minister Finans pe fer en evalyasyon lo sa sistenm ki egziste ozordi e revwar ki mannyer nou kapab ganny plis efikasite avek sa servis netwayaz.

En desizyon i bezwen ganny pran si nou pou kit striktir *Cleaners Corporative* parey i ete ozordi, ouswa transfer sa bann travayer dan bann Minister, Departman ou Lazans. Sa legzersis i ekspekte konplete par lafen 2021.

9.1.3 Program Lenvestisman Kapital

Mr Speaker en total Bidze R1.53 bilyon pe ganny prozekte pour lannen 2022 ki reprezant 5.5 poursan *GDP* pou nou program lenvestisman kapital. Sa i en ogmantasyon letan ou konpar avek Bidze 2021 ki ti selman 5 poursan *GDP*.

Parey Gouvernman in anonse oparavan, nou rekonnèt defi ki egziste ek lenplimantasyon proze lenvestisman kapital ozordi. Alor i pou sa rezon ki Gouvernman in kre sa nouvo Lazans Lenfrastriktir pou anmenn plis kordinasyon e sipervizyon dan lenplimantasyon bann proze.

E osi, i pou ede dan etabli bann standar e lefikasite dan planifikasyon bann proze Gouvernman. Alors nou ekspekte en gran amelyorasyon pour lannen 2022.

Sa Lazans osi pou met an plas en sistenm elektronik, pou annan plis sipervizyon dan performans son bann travayer e i pou travay lo en kalandriye enplimantasyon proze ki pou anliny avek Bidze 2022.

Mr Speaker, pour lannen 2022 Bidze pe siport lenplimantasyon konstruksyon 51 lakaz ki'n konmanse an

2021 e osi lenfrastruktir pour 116 kare later *land bank*. Bidze 2022 pou fer provizyon pou konstriksiyon 37 nouvo lakaz e 88 nouvo kare later.

Minister Later ek Lakaz pou eksplor loportinite lo kalite e standar lakaz e kou pou konstrir lakaz. Sa i ava ede pou revwar afordabilite lakaz. Gouvernman pou responsab pou konstrir '*low cost housing*.' Nou'n diskite e agree avek *GICC* pou konstriksiyon bann *condominium* pour bann profesyonnel e *Nouvobanq* in dakor pou ofer bann *loan* a en to lentera 5.5 pousan avek en peryod repeyman ziska 30 an.

Sa i a fer li pli abordab pour bann profesyonnel. Gouvernman pe osi fer lapel avek bann lezot labank komersyal e sekter prive, pour zot osi ofer finansman ek konstriksiyon bann proze akomodasyon a en pri abordab.

Mr Speaker, en total R3.3 milyon pe ganny bidzete e 11.6 milyon an 2022 anba Bidze Lapolis pou renovasyon Stasyon Lapolis Santral e en nouvo stasyon lapolis La Digue respektivman.

Gouvernman in fer en alokasyon dan Bidze 2022 pour sekter lasante *comme* swivan ;

- i. Konstriksiyon nouvo Lopital La Digue - R53 milyon
- ii. Konstriksiyon sant reabilitasyon - R 34.5 milyon

Mr Speaker, nou'n osi fer en alokasyon R11 milyon pour renovasyon bann diferan lenfrastruktir sportif *comme* swivan ;

- i. R2 milyon - pour renovasyon Stad Linite
- ii. R2 milyon - pour renovasyon *Palais Des Sports*,
- iii. R3.75 milyon - pour renovasyon Anse Royale *Sports Complex*
- iv. R1.75 milyon - pour renovasyon La Digue '*Sports Complex*' e
- v. en alokasyon R 1.5 milyon pour renovasyon bann lezot fasilite lenfrastruktir sportif.

En alokasyon bidzeter pour en total R42 milyon i dan Bidze 2022 pour Lotorite Endistriyel, (*IEA*). Apard ki lenfrastruktir lo *Zone 6* e 20, e osi Ile Eve, en proze Park Maren endistriyel pou konmanse en 2022. Sa proze pou ede avek bann *workshops* e landrwa apropriye pour bann enzenyer *marine* e osi *auto mechanic*.

Minister Gouvernman Lokal e Zafer Kominoter pe ganny en alokasyon R20 milyon pou bann pti proze kominoter, konpare avek R10.5 milyon dan Bidze 2021.

Mr Speaker, parey zot okouran, Gouvernman pe depans an mwayenn R179.3 milyon par lannen dan bann lokasyon ki Gouvernman i lwe. Nou pou bezwen vin avek bann nide inovatif pour nou kapab redwir sa sonm dan Bidze.

Nou pe travay avek *GICC* pou konstriksyon en nouvo batiman pour Komisyon Reveni e nou ekspekte sa batiman ava konplete ver milye 2023.

An se moman, *SRC* pe depans R19.2 milyon dan lwe lofis. *GICC* pou pran en *loan* pou fer konstriksyon en batiman pour *SRC* e nou pou servi sa Bidze pou pey *GICC* pou fer sa repeyman sa *loan*. E dan long term sa batiman pou vin pour Gouvernman. En alokasyon bidzeter R5 milyon in ganny mete pou konmans pey lentere lo sa *loan*.

Mr Speaker, nou osi pe travay konzwentman avek *GICC* lo renovasyon Sant Kiltirel Nasyonal koni koman Libreri Nasyonal e nou ekspekte sa proze pou konplete ver lafen 2022. Sa proze in tro tarde e i pa akseptab konman en pei ki

nou Libreri Nasyonal pa ouver pour nou popilasyon.

Plan, se pour devlop sa batiman e transform li koman en '*learning centre*' pour nou popilasyon. En alokasyon R3.5 milyon in ganny mete pou konmans pey lentere lo sa *loan*.

Mr Speaker, nou osi ekspekte ki proze reabilitasyon e agrandisman Por Victoria i demare lannen 2022. Premye faz sa proze i ekspekte kout €29.7 milyon e pe ganny finanse par Labank Lenvestisman Eropéen (*EIB*) e par Lazans Devlopman Franse (*EFD*).

Lotorite Por i osi ekspekte konplet nouvo lasose pasaze kot Zil Eve an 2022. Sa Lotorite pou osi fer travay konstriksyon pou *align Quay Wall* e pou konmans *dredging* lo sa baz La Digue. *SMSA* osi pe travay pou moderniz son sistenm lenformasyon teknolozi.

Mr Speaker, ozordi nou erport pa reflekte nou limaz koman en destinasyon 5 Zetwal. Nou bezwen en Erport pli modern. Gouvernman pe travay konzwentman avek Lotorite Lavyasyon Sivil, (*SCAA*) lo bann diferan opsyon lo proze devlopman erport. *SCAA* pe osi fer en evalyasyon lo kondisyon *runway*.

Mr Speaker, Bidze pou lannen 2022 ki Lotorite Lapes Sesel in fer pou Sekter Artisanal i *comme* swivan;

- i. Bazar Cascade - R4.3 milyon
- ii. Bazar Anse Aux Pins - R9.1 milyon
- iii. Glacis, bazar i dan en staz *tender* e *store* pou lekipman lapes i dan staz *planning*.
- iv. Grand Anse Praslin lenstalasyon masin *ice* in konmanse, konstriksyon *store* pou lekipman lapes e renovasyon bazar i dan staz *planning* e
- v. Baie St. Anne Praslin - R11.4 milyon pour en fasilite bazar, *gear store* ek panton, travay in fini konmanse depi Septanm. Tou sa bann proze pou terminen pli tar Novanm 2022.

Nouvo proze dan distrik pour lannen 2022 i enkli ;

Proze Anse La Mouche pou ganny fer an de staz. Premye staz i konpri ouver lapas pou peser debark zot pwason e pran *ice*. Sa proze in ganny bidzete a R2 milyon. Dezyenm faz ki pou konmanse lannen 2022 e termin 2023 i konpri, bann fasilite debaz pour bazar e *store* pou gard zot

lekipman travay. Sa proze pou kout environ R3 milyon.

Proze La Riviere Anglaise i dan prosesis diskisyon avek bann parti konsernen. Sa proze i sipoze enkli reklanmasyon bazar, *store* lekipman e lenstalasyon *panton*.

SFA pe get dan posibilite konstri en pti bazar Beau Vallon. Avek konsiltasyon, *SFA* pou konstri en bazar pou deservi peser e tou dimoun ki travers sa distrik.

Aprè konsiltasyon ek peser ek zabitan La Digue, *SFA* pou enstal en panton obor bazar ek masin *ice* La Passe, pou fasilite aktivite lapes e anpes por La Passe vin ankonbre.

9.1.4 Benefis e Program Lazans Proteksyon Sosyal (ASP)

Dan Bidze 2022, pli gro sonm i en total R1.44 bilyon pou bann benefis ek program anba Lazans Proteksyon Sosyal (ASP), e alokasyon i *comme* swivan ;

- R820.6 milyon - pour benefis retrait
- R109.4 milyon - pour benefis envalidite
- R141.8 milyon - pour benefis dezabilite
- R299.4 milyon pour *Scheme Home Carer*.

R40.7 milyon pour ‘*Safety Net*’

Mr Speaker, parey nou’n konmanse dan Bidze 2021, pour 2022 nou’n retir administrasyon en pe *Scheme* anba Lazans Proteksyon Sosyal e met li kot bann lezot antite. E sa i *comme* swivan ;

- R27.95 milyon *Scheme Daycare* avek Lenstiti pour Devlopman Pti Anfans, (*IECD*).
- R 9.2 milyon *Scheme* avek *SPTC* pour bann retrete ek dimoun ki otreman kapab.
- 1.2 milyon *Scheme* transpor bann zil pros pour referans medikal pou al kot Minister Lasante e
- R 2.4 milyon *Scheme* lasistans lakaz pou bann endividi dan sirkonstans *emergency* kan i annan en dife ouswa dezaz, pou al kot Minister responsab pour Gouvernman Lokal.

9.1.5 Depans Enprevi (Contingency)

Mr Speaker, pour lannen 2021 nou pe met en alokasyon R50 milyon pour bann depans enprevi oubyen *contingency*. An vi defi finansyel, Gouvernman

pa pou ankor dan en pozisyon sa lannen pou pey dezyenm faz konpansasyon pour bann ka polisyon delo La Miser. Nou pou anvoy li dan Bidze mwayen term.

10. Bann Mezir Fiskal

110.1 Reform Taks

10.1.1 Reform Taks lo Biznes

Mr Speaker, parey mon ti anonse dan Bidze 2021, Gouvernman in travay lo en reform dan rezim taks lo biznes ki pou konmans ganny enplimante konmansman Zanvye 2022.

Atraver sa reform nou ti oule armoniz bann diferan to taks ki egziste dan Lalwa taks lo biznes e entrodwir en sel rezim.

Ozordi sa to taks i - 25 poursan lo profi ziska R1 milyon e 30 poursan lo okenn profi par lao R1 milyon. A parti le 01 Zanvye 2022, nouvo to taks lo profi biznes pou *comme* swivan ;

- 15 poursan lo profi ziska R1 milyon
- e apre sa, 25 poursan lo profi ki par lao R1 milyon.

Mr Speaker, sa nouvo to taks pou osi aplikab pour bann Sekter ki ti annan en to preferans oparavan, tel ki ;

tourizm, lapés, *casino*, bann *International Corporate Service Providers*. Bann biznes ki ganny liste lo *Seychelles Securities Exchange* e bann biznes enplike dan servis medikal.

Prenon kont lobzektif Gouvernman pou devlop e agrandir nou Sekter Lagrikiltir, sa sekter pou ganny en gras lo peyman taks pour 3an, konmansman 2021. Apre sa 3an, en revi pou ganny fer.

I bon note ki bann peser, (endividi ki dan Sekter Lapés) zot pou kontinyen ganny sa egzansyon ki egziste ozordi. Parkont, to taks pli o lo biznes dan bann sekter ki dan servis telekominikasyon, labank, lasirans, prodiksyon lalkol e sigaret pou reste 33 pousan lo zot profi par lao R1 milyon.

Gouvernman pou mentenir opsyon taks ‘*presumptive*’ ki ganny sarze lo bann pti e mwayen lantreprenè ki zot reveni i anba R1 milyon par lannen.

Dezyenmman, nou pou redwir sa to depresyasyon akselere lo lenvestisman kapital, apard ki batiman, ki ariv ziska 145 pousan dan 5 an, pour bann biznes ki annan pour fer avek tourizm, lagrikiltir ek lapés, konpare ek lezot sekter pou ariv 100 pousan.

Trwazyenmman, bann depans ki relye avek saler ki ganny peye a bann travayer ki sorti dan bann sant profesyonnel, zot dediksyon lo zot taks *return* pou vin 125 pousan. Oparavan i ti 200 pousan.

En pousantaz pou osi aplikab lo saler ki ganny peye ek bann etidyan sorti dan bann sant profesyonnel e ki ganny anploye *part time*. I pou sorti 150 pousan pou vin 125 pousan.

Mr Speaker, nou pe osi travay konzwentman avek Lorganizasyon pour Korporasyon Ekonomik ek Devlopman, (*OECD*), lo *taxation* lo bann reveni ki ganny kolekte par bann antite miltinasyonal atraver zot bann loperasyon ki pran plas prensipalman *online*.

Prenon kont, kompleksite koleksyon reveni lo sa bann tranzaksyon nou pou konmans en seri konsiltasyon dan lannen 2022 avek lentansyon ki sa rezim i vin an plas 2023.

Nou osi pe travay konzwentman avek Labank Mondyal pou propoz bann lezot lamannman dan taks biznes lo sa ki konsern ‘*transfer pricing*.’

10.1.2. Kondisyon Laysenns pour sekter *retail*

Mr Speaker, nou rekonnèt defayans ki egziste ozordi dan koleksyon reveni apropiye dan Sekter *Retail*. Alors, Gouvernman pe met sa bann kondisyon adisyonnèl pour *license comme* swivan pou Sekter *Retail* ;

- i. Tou antite pou bezwen annan en *cash register*
- ii. Tou antite pou bezwen annan en masin *point of sale* pou donn opsyon son kliyan pou pey ek son kart labank

Dezyenm faz ki nou pou travay lo la, se fer sa *cash register* konekte direk avek sistenm Komisyon Reveni. Gouvernman i an diskisyon pour en don pou finans sa sistenm. Nou pou osi met menm kondisyon pour bann lezot sekter a lavenir.

Avek lasistans *IMF* nou pe fer en revi lo lenplimantasyon *VAT* pou minimiz labi dan sistenm koleksyon *VAT*.

10.1.3. Revizyon Lo Lankadreman taks ki ganny sarze letan en lasosyasyon saritab i ganny en donasyon

Mr Speaker, souvandfwa bann lasosyasyon saritab i bezwen pey taks kot ladwann lo donasyon ki zot resevwar. Nou pou travay lo en lankadreman

pou fer sir ki i annan plis laklerte e lazistis lo sa prosedir.

10.1.4. Reform Taks lo Saler

Mr Speaker, nou pou revwar dezyenm '*schedule*' dan Lalwa taks '*Income and Non-Monetary Benefits*' pou anmenn en pe plis laklerte lo bann saler ki pa ganny takse. Ozordi, letan en travayer i resevwar en *back pay* i kapab pey taks pli o pour sa mwan ki in ganny peye, konpare avek son taks ki i peye tou le mwan. Sa nou vwar li konman enzis.

Rezon prensipal, se aköz ozordi sa *exempt threshold* R 8,555.50 i pour en mwan. Alors pou adres sa, nou pou revwar sa sistenm taks lo saler pou anmenn plis lazistis.

Dan mwayen term nou pou travay lo en sistenm taks lo saler, ki nou pou anmenn bann dediksyon dan depans ki travayer i fer. Nou pou kapab realiz sa ler nou'n konplet enplimantasyon sistenm taks Komisyon Reveni.

10.1.4. Retir '*Excise*' Taks Tanporer li bann transpor ki later pasaze

Mr Speaker, an Zanvye sa lannen, an vi ki nou ti dan en kriz ekonomik e nivo deviz etranzer dan sistenm ti ba, nou

ti entrodwir en taks adisyonnèl tanporer lo bann transpor lo later ki ganny servi pou anmenn pasaze. Nou ti anonse ki sa mezir pou reste an fors ziska ler nou vwar en sanzman pozitiv dan nou rezerv deviz etranzer e ki to lesanz i stabilize.

Mr Speaker, parey zot remarke nou bann mezir fiskal e monneter in ede pou stabiliz to deviz etranzer e nou bann Polisi in ede ki nou rezerv deviz etranzer i lo en nivo akseptab.

E se pour sa ki Gouvernman in anonse an Septanm ki sa taks 'excise' tanporer, 25 pousan adisyonnèl ki ti entrodwir le 01 Zanvyè sa lannen, pou ganny retire le 01 Zanvyè 2022. Nou'n donn bann lakonpanyen lokal sa 3 mwan *notice*, pou asire ki zot ganny ase letan pou fer zot plan biznes e prepar zot pou sa sanzman.

10.2. Soutenabilite Fon Pansyon Sesel e Reform lo Benefis Retret

Mr Speaker, dapre dernyen evalyasyon *actuarial* ki ti ganny fer lo Fon Pansyon an 2018, Seselwa pe viv pli lontan, e depi 2019, kontribisyon ki Fon Pansyon i kolekte avek son bann manm pa ase pou pey son

bann benefis ki pe kontinyelman ogmante.

Bann rekomandasyon ti ganny fer avek ladministrasyon avan lo bann mezir ki bezwen ganny pran, pou asir soutenabilite Fon Pansyon. Me nanryen pa'n ganny fer. E si sa i kontinyen, son rezerv pou redwir e sa fon pou 'collapse.'

Enn bann premye mezir ki Fon Pansyon in rekomande se pou ogmant laz retret pou sorti 63 an pou vin 65 an apartir 2023. An menm tan, Fon Pansyon in met bann opsyon pou pran retret a laz 60 an, me avek en pansyon redwir.

Fon Pansyon pou osi komans en seri konsiltasyon avek piblik ek sekter prive, pou diskite sa sityasyon ki i vwar li ladan e bann opsyon pou asir son soutenabilite. A lafen premye kar lannen prosenn ler sa legzersis i konplete, Fon Pansyon a prezant son rekomandasyon avek Gouvernman pou lenplimantasyon.

10.3. Restriktirasyon dan servis piblik

Mr Speaker, depi 2013 Gouvernman pe enplimant en lankadreman ki baze lo rezilta e performans an diferan faz. Sa lankadreman i koni konman

Result Based Management oubyen *RBM*. *RBM* i en lapros entegre ki mezir performans e i ganny fer anliny avek bann prosedir planifikasyon e bidzeter. Sa lapros i ganny servi par bokou Gouvernman dan bann lezot pei.

An Out sa lannen, Konsey Minis ti aprouve ki *RBM* i ganny enplimante dan son totalite atraver Gouvernman. Sa, i montre nou langazman pou obtenir meyer rezilta atraver servis piblik.

Nou rekonnèt ki ozordi i annan bokou defayans dan performans sekter piblik. Avek sa lapros *RBM* ki ava enkilke bann prensip efikasite, latransparans e rankont, e an plis i met lanfaz lo performans endividi e lorganizasyon.

I enportan pou note ki pour sistenm *RBM* marse, i bezwen en planifikasyon stratezik ki kalib, en Bidze ki ankouraz o performans, swivan en evalyasyon korek e osi bann sistenm apropiye pou mezir performans.

Avek sa bann kondisyon an plas, sa i ekspekte anmenn bokou amelyorasyon dan servis Sekter Piblik. Me, i egalman enportan pou note ki *RBM* i pa zis en sistenm, me osi en nouvo prensip mannyer keksoz i ganny fer dan sekter piblik.

Annefe, en faktor enportan e nesese pour sikse a lavenir, se en sanzman *mindset* dan travayer sekter piblik, kot zot bezwen pran plis responsabilite dan sa azanda reform.

Alors, *RBM* pou amelyor lefikasite dan loperasyon e alokasyon resours dan sekter piblik, e kree plis lespas fiskal pou provizyon bann servis piblik ki esansyel.

Pour bann sitwayen Seselwa sa pou vedir ;

- Plis servis pou adres bann defayans dan lasante, ledikasyon. Zesyon bann resours natirel, delo e sanitasyon, lenerzi, lenfrastruktir e bann lezot servis de baz.

Sa, pou ganny fer par evalyasyon efektiv bann lenpak fiskal e sosyal. Alors, sa pour anmenn bann servis pli meyer pou amelyor kalite lavi pour tou bann diferan kous popilasyon.

An azoutan, lenplimantasyon total *RBM* pou baze lo en lapros planifikasyon par portfolyo. Sa i vedir ki sak portfolyo pou gid son bann Departman e Lazans dan sa prosedir atraver planifikasyon stratezik, bidzeter, swivi e evalyasyon e sistenm pou mezir performans. Sa pou asire ki rankont i al anver bann Minis,

bann lezot o zofisye e bann Bidze enstitisyonnel.

An plis, sak portfolyo pou kapab prodwi en plan stratezik ki konpreansiv e bann bon kalite plan performans anyel. An fezan sa, i pou garanti ki tou bann antite Gouvernman pe vreman planifye pou delivre rezilta.

E sa pou fer ki mantalite travayer Gouvernman i sanze e tou endividi i fer sir i travay lo en performans tre o, baze lo plan stratezik son antite. Tousala pou baze lo amelyorasyon kontinyel, pli bon fason delivre servis e akonplisman nou bann lobzektif nasyonal.

Mr Speaker, nou rekonnet ki sa transformasyon dan sekter piblik pou bezwen annan formasyon nesaser pour nou travayer. Alors, Gouvernman pe fer en alokasyon R2.5 milyon dan Bidze 2022 pou travay konzwentman avek Lenstiti Guy Morel pou donn sa bann formasyon. Sa lenstiti pou zwe sa rol konman sa *Public Service College* pou Gouvernman.

Mr Speaker, avek sa nouvo fason fer nou pou osi revwar rol, manda e striktir Departman Ladministrasyon Piblik. Departman Ladministrasyon Piblik pou met bann lankadremman e standar

an plas e bann desizyon ki konsern resours imen pou ganny pran par bann Minister, Departman e Lazans.

En model ki pli desantralize pou donn plis lotonomi bann Minister, Departman e Lazans, me zot pou bezwen swiv en lankadremman ki'n ganny agree.

Nou pou osi kree en Komisyon Sekter Piblik pou fer lapwentman bann egzektiv *senior* dan sekter piblik, pou asire ki annan plis la transparans e meritokrasi dan lapwentman. Sa i ava ede retir okenn politik dan lapwentman bann egzektiv *senior* dan sekter piblik.

Mr Speaker, nou pou osi revwar sa fonksyon Seksyon Kontabilite dan sekter piblik ki ti pe ganny santralize avek Minister responsab pour Finans. An Zanvye 2022, tou bann travayer dan Seksyon Kontabilite pou ganny transfer dan bann Minister, Departman e Lazans.

Sepandan, Minister responsab pour Finans pou kontinyen travay avek sa bann travayer pou fer sir ki nou met bann prosedir e standar an plas, pou anpes okenn labi dan depans Gouvernman ki kapab arive.

Nou pou osi kontinyen met an plas bann formasyon neserer, pour bann travayer kapab deservi zot fonksyon parey Lalwa lo Zesyon Finans Piblik i demande.

12. Lenportans finansman ki abordab pou siport rekiperasyon lekonomi

Mr Speaker, parey i le ka dan bokou pei, Labank Santral i rekonnet lenportans bann fasilite finansman ki abordab. Se anliny avek sa, ki i ti met an plas de laliny kredi an 2020 pou siport bann biznes ki'n ganny afekte avek COVID-19.

Atraver partisipasyon bann Lenstitisyon Finansyel ki pe administre sa 2 *Scheme*, bann mikro, pti e mwayen lantrepriz pe ganny akse avek kredi lo en to lentere 1.5 pousan e pour bann gro biznes To Lentere i 4.5 pousan.

Sa, i pou ed zot mentenir zot loperasyon e soulaz difikilte ekonomik ki zot pe eksperyans.

Labank Santral in osi redwir son To Lentere Polisi Monneter par 3 pousan depi dezyenm kar 2020, pou ede siport lekonomi pei.

An Zen sa lannen, *Board* Labank Santral ti egalman aprouv en azisteman dan

striktir To Lentere ki ekspekte anmenn en rediksyon zeneral dan to lentere lo *loan* ki bann Lenstitisyon Finansyel i donn zot kliyan.

Labank Santral in kominik sa lekspektasyon avek marse an zeneral, atraver lentervansyon ki Gouverner in fer lo medya e osi avek bann Lenstitisyon Finansyel, pandan bann rankont endividyel ki'n fer boner an Oktob.

Baze lo bann To Lentere endikatif ki bann Lenstitisyon Finansyel in soumet avek Labank Santral, To Lentere pour bann *loan* biznes e osi *loan* lakaz in desann.

Dapre lenformasyon, konsernan to lentere ki bann labank ek *Seychelles Credit Union* in sarze, ki zot soumet avek Labank Santral, an mwayenn To Lentere lo *loan* lakaz in desann par 0.84 pousan, sorti 7.55 pousan lafen Septanm pou vin 6.71 pousan. Pour *loan* biznes ki bezwen sekirite i annan en rediksyon 0.72 pousan an mwayenn dan To Lentere.

A lafen Septanm, an mwayenn to lentere lo sa kalite *loan* ti 11.28 pousan, e la aprezan i 10.56 pousan. Tandis ki *loan* biznes ki pa demann sekirite, in annan en rediksyon 1.28 pousan an

mwayenn, sorti 16.57 pousan pou vin 15.29 pousan.

Mr Speaker, la mon oule fer kler ki sa bann rediksyon ki mon'n fek mansyonnen i endikatif, ki vedir i kapab annan diferans dan To Lentere ki sak Labank Komersyal ek SCU pe sarz zot kliyan.

Rediksyon dan to lentere i ekspekte siport ogmantasyon aktivite dan sekter prive e an retour siport zefor pou relans lekonomi.

Mr Speaker, bann labank i bezwen kontinyen fer zefor pou redwir to lentere e amelyor akse kredi pour biznes. Minister Finans ek Labank Santral pe travay lo bann mezir pou asir plis konpetisyon dan Sekter Banker. I ankor tro ser e difisil pou kliyan bouz zot fasilite ant diferan labank.

Enn bann mezir se; pou target bann kou asosye avek rezistrasyon e transfer bann sekirite. I annan plizyer lezot mezir ki pou ganny anonse par Minister Finans e Labank Santral a lafen sa legzersis par milye lannen 2022.

13. Transformasyon Lekonomi

Mr Speaker, parey nou ti anonse dan Bidze 2021, nou

lazanda transformasyon ekonomik i *comme* swivan; *“En Stratezi Ekonomik Soutenab e Enklizif, Pour en Sanzman Transformasyonnel.”*

Sa stratezi i bezwen ganny enplimante avek plis langazman e konsiltasyon ek sekter prive. Ogmant reveni dan Sekter Tourizm, batir en lekonomi pour ki i a pli kapab soutenir bann sok ekonomik, ogmant lefikasite dan sekter servis piblik, promouvwar leksplwatasyon soutenab nou resours maritim e osi entegre teknolozi dan nou lapros pou nonm enn de konponan.

An gro, sa stratezi i kouver 5 Sekter.

13.1. Sekter Tourizm: En Sekter pli Rezilyan e Entegre dan Lekonomi

Mr Speaker, Sekter Tourizm i reste sa Sekter ki anmenn plis reveni dan lekonomi. Me nou'n osi konstate lenpak pandemik COVID-19 in anmennen lo sa sekter. Alors nou stratezi pour sa sekter se pou fer sir ki i annan **En Sekter pli Rezilyan e Entegre dan Lekonomi** e nou bezwen travay ankor plis avek sa sekter pour nou ;

- i. Ogmant reveni

tourizm, par met plis lanfaz pou annan plis servis ek prodwir ki ava ankouraz bann viziter pou depans plis dan lekonomi.

ii. Batir en Sekter pli rezilyan e pli entegre dan lekonomi par amelyor nou prodwi ki nou ofer, promouvwar Polisi diversifikasyon e pli byen enkilke nou lidantite Kreol dan sa ki nou ofer.

iii. Annan plis sinerzi avek Sekter Lagrikiltir ek Lapes pour ki plis prodwir lokal i ganny servi dan letablisman tourizm.

13.2. Sekter Lagrikiltir: Ogmant Sekirite Alimanter, Redwir Lenportasyon e Kreasyon Bann Sistenm ki ankouraz plis konsonmasyon prodwi lokal dan Lekonomi

Mr Speaker, stratezi pou Sekter Lagrikiltir se pou en **“Transformasyon dan sistenm manze pou batir en sistenm pli konpetitiv e produktiv.”**

Sa stratezi, i vadir ki nou bezwen planifikasyon ki al pli lwen ki 5 an pour nou tou benefisyè avek sanzman sosyoekonomik ki i anmennen. Pou realiz sa stratezi, nou

bezwen elev prodiksyon lavyann poul ek *pork* pou ariv par lao 80 pousan *market share* ;

Elev prodiksyon bann fri ek legim ki ganny kiltive Sesel, pou ariv plis ki 90 pousan. Nou pou bezwen ogmant kapasite nou bann fermye pou fer fas avek sanzman klima, e redwir bann maladi ki annan pour fer avek manze ek nitrisyon.

Pour nou arive delivre sa bann bi, nou bezwen enplimant bann proze ek program sarze e anbisyè, si nou pou sorti dan sa sityasyon aktyel kot nou depan preski antyerman lo enportasyon pou nourir nou pep.

Sa ki konsern prodiksyon lavyann poul, Departman Lagrikiltir in vwar ki in kontinyen ogmante depi 2013, sorti 216 *MT (Metric Ton)* pou ariv pres 1000 *(Metric Ton)* pour lannen 2020. E sa premye 6 mwan 2021, i montre ki malgre pandemik *COVID-19* prodiksyon pou klerman depas sa nivo.

Sa Departman i konfidan ki byento avek bann mezir parey akse avek finans, e tir restriksyon, nou pou kapab depas sa rikord 1,560 *MT (Metric Ton)* ki ti anrezistre an 2006.

Egalman, prodiksyon dizef in kontinyelman ogmante pou ariv pres 39 milyon dizef ver lafen 2020, ki reprezant 100 pousan prodiksyon lokal. An sa ki konsern prodiksyon *pork*, a la fen 2020 Departman Lagrikiltir in rikord en prodiksyon lokal 587 MT (*Metric Ton*). Sa i fer ki i annan 41 pousan prodiksyon lokal.

Nou pou bezwen ranforsi sistenm *supply* ek *value chain* pou fer ki nou vin pli prodiktiv e osi konpetitiv. Parey mon'n dir, sanzman klima i en priyorite.

Alor, nou pou bezwen investir dan plis resers pou protez resours zenetik lokal, investir dan bann lenfrastruktir pou redwir risk inondasyon, ogmant kapasite irigasyon, entansifye lenvestisman dan kiltivasyon anba kouvertir e osi kapasite pei pou fer fas avek pes e maladi.

Sa ki konsern lenvestisman, nou pou bezwen pli aktiv pou mobiliz e diversifye bann sours finansyel pour bann ki dan prodiksyon. Egalman nou pou bezwen osi amelyor bann proze formasyon pou devlop plis resours pou Sekter Lagrikiltir.

Mr Speaker, pou siport sa bann Polisi nou pe fer en alokasyon R123.4 milyon dan

Bidze 2022 pour sa sekter. Sa alokasyon i enkli R13.6 milyon pou konstrir nouvo labatwar lo Mahe e Praslin.

13.3. Sekter Lapes e Lekonomi Ble: Promosyon Valer Azoute e Moderniz Lenfrastruktir

Mr Speaker, nou stratezi dan Sekter Lapes ek Lekonomi Ble se pou "**Promouvwar Valer Azoute e Moderniz Lenfrastruktir.**" Sekter Lapes i en sekter kle ki annan bokou potansyel. Nou konsonmasyon pwason par kapita i parmi bann ki pli o dan lemonn e sa i montre ki pwason i zwe en rol enportan dan nitrisyon nou popilasyon.

Sours prensipal nou konsonmasyon pwason i sorti kot bann peser artizanal. e pou demontre zot lenportans nou'n zwenn avek Lasanble Zeneral Nasyon Ini pou selebre lannen 2022, koman lannen enternasyonal pour lapas artizanal ek akwakiltir. I pou en lannen enportan pou Sekter Lapes, an vi ki i pou rekonnet kontribisyon bann peser artizanal ek travayer dan domenn lapas ek akwakiltir.

Mr Speaker, dan Bidze 2022 en alokasyon R108.1 milyon in ganny fer pou Sekter

Lapes e Lekonomi Ble. Lanfaz dan Sekter Lapes i lo valer azoute. Lenplimantasyon proze lenfrastriktir mazer lo *Zone 14* pou Sekter Lapes Endistriyel in ariv a en staz avanse.

Nou ti fer en lapel pou envit bann lenvestiser potansyel pou devlop bann fasilite valer azoute dan Sekter Lapes lo en bout later 70,000 met kare. Nou'n fer alokasyon avek lenvestiser e nou pe travay avek zot pou finaliz zot lagreman.

Devlopman i kontinyen lo Ile du Port. *SFA* i anvizaze kontinyen met resours pou asiste bann lendistri valer azoute dan Sekter Lapes. Pli spesifikman bann lizin transformasyon pwason.

Bidze pou ganny mete pou fer semen entern ki al kot sa bann lizin, pou fer drenaz e osi pou fer le nesese pou met elektrisite. An tou, *SFA* in met en Bidze R27.5 milyon ki pou fer par staz anba en *consultancy management process*.

Ankor lo Ile du Port, lo kote kot i repar bann lasenn, *SFA* pou re sirfas sa landrwa, swa avek koltar ou beton e fer drenaz apropiye. Pli tar, *SFA* i anvizaze konstri bann fasilite nesese ki pou deservi bann operater reparasyon lasenn, ki

a osi enkli en langar pou resiklaz lasenn. En proze ki fek pe komanse. En Bidze R4.5 milyon in ganny mete pou sa proze.

Nou stratezi dan Sekter Lekonomi Ble i enn ki ankouraz **'Devlopman soutenab nou Losean e devlop bann nouvo sekter dan Lekonomi.** Gouvernman in investir bokou dan devlopman Akwakiltir e la le moman in arive pou komersyaliz sa sekter.

Sa lannen, nou'n vwar lansman sa sekter e nou profit sa lokazyon pou lans en lapel avek investiser lokal e etranze pou vin investir e kontribye dan sa sekter. Sa, i ava evantyelman kontribye anver sekirite alimanter e kree larises pour nou pei.

Dezyenm faz proze konstriksyon pou Akwakiltir pou konmanse lannen prosen. An 2022, *SFA* pou konmans konstriksyon lofis ek laboratwar Providence kot bann zofisy Akwakiltir pou site.

Tou proze devlopman lenfrastriktir ki benefisy Sekter Lapes direkteman pou ganny finanse anba Lagreman Partner Lapes Soutenab ant Sesel ek Linyon Eropeen.

13.4. Sektor “Digital Economy” (Lekonomi Enformatik)

Mr Speaker, stratezi lekonomi enformatik i tre enportan dan sa lazanda transformasyon ekonomik. Pli boner sa lannen Kabinet in aprouv bann rekomandasyon pour sa sektor, e Komite ki’n ganny apwente in travay lo en plan aksyon pou lenplimantasyon.

Sa plan aksyon i annan bi pou **“Amelyor lentegrasyon Teknolozi dan pei e dan Sektor Finansyel.”**

E sa pou dan 5 pilye ki ;

- i. Amelyor lenfrastruktir teknolozi dan pei.
- ii. Amelyor *digital skills* pour asir lenklizyon popilasyon e akse egal a loportinite ki teknolozi i raporte.
- iii. Promouvwar e enplimant plis platform nimerik dan servis piblik.
- iv. Amelyor lenklizyon finansyel par *digitalizing* bann sistenm peyman.
- v. Devlop bann striktir ki ankouraz en kiltir lantreprenarya pour ede diversifye lekonomi.

Departman Teknolozi Lenformasyon ek Kominikasyon, (*DICT*) pe travay lo 2 linisyativ avek bi prensipal pou redwir kou enternet dan pei. Premye linisyativ, i en kolaborasyon avek Labank Santral pou fer en letid lo afordabilite servis *broadband internet* e son bann faktor ki determin son kou.

Sa lot linisyativ i en kolaborasyon avek Komisyon Komers Zis (*FTC*) pou angaze avek lakonpanyen ki pe donn servis ‘*Submarine Cable System*’ pou adopte en liniformite dan pri pour bann kliyan, menm si zot pa en aksyoner sa lakonpanyen, e loportinite pou redwir pri lo *bandwidth* enternasyonal.

Mr Speaker, Prozedlwa *Cybercrime* i deza Lasanble. Gouvernman pe osi travay lo en Prozedlwa, *Data Protection* ki pou ganny prezante an 2022. Sa Lalwa i enportan espesyalman avek devlopman dan Sektor Finansyel.

Gouvernman pe osi met an plas bann striktir nesaser, pou asire ki en lanvironnman konpetisyon i egziste dan domenn telekominikasyon. Nouvo Prozedlwa Kominikasyon ki pou devan Lasanble Nasyonal boner 2022, i annan bi adres amelyor konpetisyon.

Gouvernman pe osi fer le neserer pou met an plas bann provizyon legal, pou fasilite konsonmator bouz avek zot nimero telefoni si zot deside sanz operater.

Mr Speaker, *DICT* in fer bokou travay dan son lenplimantasyon sistenm *electronic-ID* ki nou ekspekte pou operasyonel dan premye kar 2022. Sa proze pou ede fasilite tou lezot linisyativ nimerik.

Gouvernman in osi angaze pou kontinyen dan son lenplimantasyon son bann proze pou fer ki son bann servis i aksesib *online*, par egzamp sa bann servis swivan pou konmans aksesib *online* an 2022 :

- i. Rezistrasyon bann biznes e Lasosyasyon. Aplikasyon ou renouvelman *license*
- ii. Deklarasyon taks e soumisyon taks *return*

Proze *Collateral Register* in konplete an 2021 e dimoun pe aktyelman servi sa servis *online*.

Dan Bidze 2022, Gouvernman in osi fer alokasyon pou konplet serten sistenm e osi pou konmans enplimantasyon lezot sistenm an 2022 ki konpri:

- i. *Health Information System (HIS)* ki'n kout Gouvernman en total R113.2 milyon pou vin operasyonel an 2022
- ii. En nouvo Sistenm Lenformasyon entegre pou Zesyon Fon Piblik, (*Intergrated Financial Management Information System*) pou konmans an 2022 e nou ekspekte sa sistenm pou vin an operasyonel an 2024. En alokasyon R9 milyon in ganny mete dan Bidze pou konmans sa proze.
- iii. En modern *Taks Management* sistenm. En alokasyon €1.8 milyon in ganny mete dan Bidze pou konmans sa proze.

13.5. Sekter Finansyel

Mr Speaker, Sekter Finansyel i en lot sekter ki nou vwar sa transformasyon pou arive e pou annan plis krwasans dan mwayen term. Nou lobzektif prensipal pou devlop Sekter Finansyel i *comme* swivan ;

- i. **Met an plas bann Lalwa neserer pou fer**

**nou an konformite
ek standar
enternasyonal**

Sa lannen, Lasanble Nasyonal in aprouv 13 Lalwa pour fer sir ki Sesel i an konformite avek standar enternasyonal e nou'n war rezilta sa travay.

An Oktob sa lannen, Sesel in sorti lo *Annex I* lalis Linyon Eropéen pour bann ziridiksyon ki pa korpore lo taks e ganny anmennen lo *Annex II*.

Sesel pou sorti lo sa *Annex II*, ler Lorganizasyon pour Korporasyon Ekonomik ek Devlopman, (OECD), i fer en vizit an 2022 pour evalye lefikasite lankadremans lesanz lenformasyon taks.

Mr Speaker, lannen 2021, nou'n amelyor nou bann Lalwa pou met zot azour avek bann bon pratik anba lankadremans Anti-Blansisaz Larzan e pou Lit Kont Finansman Terorizm e sa i dapre standar *FATF*.

E nou'n amelyor *9 ratings* dan sa 20 defayans ki nou ti annan. Nou ekspekte pou anmenn bann lezot Lalwa par lafen 2021 e an 2022, pou fer sir ki Sesel i an konformite dan sa 11 lezot defayans.

Mr Speaker, mon i a osi anvi remersi Lasanble pou sipor ki zot in donnen, pou pas sa bann Lalwa pou tir Sesel lo sa

'blacklist'. Sa, i montre ki ler nou travay ansanm avek en sel bi nou kapab anmenn sikse pour nou pei.

Mr Speaker, travay ki nou bezwen met lanfaz an 2022 se lo lefikasite e kordinasyon avek bann lazans Gouvernman. Labank Santral pe anvizaze met an plas Lalwa ki pou gouvern loperasyon bann *non-bank credit-granting institutions*.

Swivan ladopsyon stratezi *Fintech*, Labank Santral pou osi met an plas lankadremans neseser, sa ki nou apel en *sandbox*, pou teste bann nide inovativ an sa ki konsern bann prodwi peyman.

Avek lanfaz ki bann dirizan lemonn pe mete lo nesesite pou asire ki bann mezir e Polisi ki pe ganny met an plas pou ed bann lekonomi rekipere swivan pandemi *COVID-19* i soutenab, Labank Santral ansanm avek Gouvernman in osi angaze pou anmenn sa menm lapros lo kote Sesel.

Travay in deza konmanse lo en plan dakasyon pour lenplimantasyon bann fasilite finansman pour bann proze ki soutenab ouswa sa ki nou apel *green finance*.

I osi annan en nouvo Lalwa ki pe ganny propoze pou

protez konsonmater servis finansyel ki ekspekte ganny prezante avek Lasanble Nasyonal boner 2022.

Sa Lalwa i ekspekte donn Labank Santral e Lotorite Servis Finansyel plis pouvwar pou protez lentere konsonmater bann servis finansyel.

ii. Develop bann skills neser pou fer ki nou annan plis Seselwa kalifye dan sa sekte

Mr Speaker, bann *skills* neser ki nou bezwen dan Sekte Finansyel in vin en priyorite espesyalman avek devlopman ki pe arive. Bann nouvo Lalwa ki Gouvernman in met an plas, nou'n vwar sa presyon pou bann antite dan Sekte Prive ki pe fer zot obligasyon pou rod nouvo travayer. Nou rekonnèt ki i pa sitan fasil.

Labank Santral pe kontinyen finans 2 labours tou le an. Lotorite Servis Finansyel, FSA pe osi lans son program labours o nivo Degre e *Masters*. FSA in osi ofer labours pou 20 endividi, pou fer formasyon dan *International Compliance Association, Certificate in Compliance*. Gouvernman osi pe travay pou met bann lezot mwayen neser pour ki nou

devlop plis travayer dan sa Sekte.

Mr Speaker, Gouvernman pou osi bezwen travay konzwentman avek Liniversite Sesel e Lazans pour Devlopman Resours Imen pou osi fer sir ki nou met bann labours dan Sekte Legal, kontabilite e odit.

Nou pou bezwen plis Seselwa kalifye dan sa bann domenn pou fer sir nou kapab donn bann lezot servis Sekte Finansyel.

iii. Litolizasyon teknolozi (*Fintech* ek modernizasyon sistenm peyman) lezot Inovasyon

Mr Speaker, swivan negosyasyon ki Labank Santral in fer avek lakonpanyen VISA, kou ki asosye avek serten tranzaksyon ki ganny fer an servan bann kart labank pou osi redwir apartir Fevriye 2022. Pou konmanse, sa rediksyon pou aplikab lo peyman pour sa bann komodite e servis swivan ; Karbiran, ledikasyon, servis telekominikasyon, bann marsan ki vann an detay, bann restoran e bann servis lilitite piblik, tel ki delo ek elektrisite.

Efektivman, sa demars pou fer ki sa kou ki an se moman aplikab lo bann marsan

letan en kliyan i servi son kart pou fer peyman pou redwir e sa benefis pou kapab an retour ganny pase avek kliyan.

I annan en pe letan ki Labank Santral pe diriz bann reform e modernizasyon lenfrastruktir bann sistenm peyman, avek bi ki sekter prive ava evantyelman zwe en rol pli aktiv pou diriz zefor pou anmenn sa transformasyon ki pei i anvi vwar an sa ki konsern teknolozi.

Anliny avek sa, Labank Santral pe annan langazman avek son bann partner enkli Gouvernman pou etabli en antite ki ava permet ki bann labank e osi bann lezot Lenstitisyon ki donn akse avek fasilite kredi me ki pa en labank - sa ki nou apel bann *non-bank credit-granting institutions* ava kapab kolabore pou zer bann sistenm peyman dan pei.

An sa ki konsern marse pour bann lenstriman finansyel ki ganny ofer ouswa garanti par Gouvernman, Minister Finans, Labank Santral avek lezot partner pe deza diskit fason pou devlop sa marse. Lobzektif, se pou fasilite mobilizasyon resours finansyel e ogmant likidite pou ofer plis loportinite lenvestisman dan nou marse lokal. Sa pou ede siport bann lezot mezir ki pe ganny pran

pou fer ki marse finansyel i vin pli modern.

Sa pou enkli ofer loportinite pou sekter prive, *raise funding* lo marse finansyel domestik pou siport lagrandisman zot biznes.

14. Lenvestisman, Lantreprenarya, Lendistri e fasilitasyon dan Komers

Mr Speaker, i ankor tro difisil pou fer biznes Sesel. I enportan ki annan en sanzman dan fason fer par bann antite Gouvernman ki donn bann laprouvasyon pou konmans en biznes.

Zot bezwen zwe sa rol fasilitater me pa selman dir non. I pou bezwen annan bann lendikater ki pou gid bann dele letan ki bann aprouvasyon i donner.

Rol ki sekter prive i zwe, i enportan dan sa lazanda transformasyon ekonomik. Nou bezwen anmenn sa partenarya avek sekter prive pou ogmant larises nou lekonomi e amelyor kondisyon ki siport rol sekter prive koman lantite responsab pou agrandi lekonomi. Nou lobzektif prensipal i pou ;
- Moderniz 'kad lenvestisman' pou Sesel

- Fasilit diversifikasyon soutenab pour bann prodwi e servis.
- Etabli bann striktir legal, regilatwar e bann Polisi ki siport lagrandisman lasyans, teknolozi e linovasyon dan biznes e ki anliny avek Lazanda Transformasyon Ekonomik.

Mr Speaker, Gouvernman in fer en alokasyon R50 milyon pou sibvansyon to lentere lo bann *loan SME* ziska R3 milyon. Konmansman 2022, nou pou entrodwir bann nouvo paramet pour sa *Scheme*, pou fer sir ki i anliny avek vizyon Gouvernman e met lanfaz dan bann sektor kle ki pou ede dan sa transformasyon ekonomik. Nou pou fer en prosesis konsiltasyon ek sektor prive avan nou finaliz sa bann nouvo paramet.

Gouvernman pou osi garanti en *bond* lavalier R150 milyon dan premye kar 2022 pou asiste Labank Devlopman (DBS) pou donn *loan* sa bann sektor kle pou ede dan sa transformasyon ekonomik.

Nou pe travay avek biro Prokirer Zeneral pou fer lamannman dan Lezislasyon ki ankadre prosedir *licensing*.

Premyerman nou pou entrodwir en sistenm *hybrid* ki pou desantraliz sistenm donn *licence*.

Dezyenman, nou pou entrodwir en lankadremman pou donn *license* provizyonnelman ki pou kouber laprouvasyon bann biznes inovativ ouswa bann ki mank sa lankadremman legal.

Nou pou osi konmans en seri konsiltasyon avek sektor prive pou diskit e finaliz en reform pli konpreansif lo modernizasyon Lotorite *Licensing*. Sa legzersis pou ede ;

1. Amelyor servis Lotorite *License* dan son totalite ;
2. Pou li pli byen kapab deservi bann biznes espesyalman bann mikro, pti e mwayenn antrepriz
3. Me pli enportan ganny korperasyon bann biznes kot i konsern vin rod zot *license* e swiv e respekte kondisyon *license*.

Mr Speaker, Propriyete Entelektyel i en lot sektor priyorite ki nou bezwen met lanfaz lo la pou vwar plis krwasans. Nou pe kontinyen nou prosesis sansibilizasyon pou fer sektor prive annan plis konesans dan sa sektor.

An 2022, nou pou anmenn bann lamannman neser dan Lalwa relye avek

propriyete entelektyel ki pou reflekte bann devlopman lo baz enternasyonal e dan nou lekonomi ozordi.

Nou pou kontinyen travay avek Biro Standar Sesel (SBS) pou donn zot resours neseler pou aste nouvo lekipman pou ede dan sertifikasyon bann prodwi e sa ava ede dan eksportasyon bann prodwi Sesel.

Lannen 2022 nou ekspekte travay pou amelyor sistenm Ladwann (*ASYCUDA World*). Modernizasyon ek sa sistenm pou ede enplimant servis peyman elektronik, lentegrasyon '*risk management module*', prosedir anvoy e retir komodite lo Erport ek por pou ganny fer antyerman elektronikman. Lentegrasyon en *module* pou fer evalyasyon e osi en *module* pou kourye.

Nou vizyon se pour nou devlop en *single window system* pou fasilite komers e sa a ganny servi par tou bann antite ki enplike dan proteksyon nou lafrontyer.

Mr Speaker, nou'n tann bokou konplent lo prosedir pou retir parsel ki vin par *courrier*. Sa problemn i pli prominan ler bann parsel i par lao sa taks *free allowance*, vi ki bann kliyan i bezwen al fer bann prosedir

zot menm kot lofis ladwann kot Erport. Mon ti'n kree en komite pou redres sa bann problemn e zot in vin avek bann solisyon konkret.

Apartir premye kar lannen prosenn nou anvizaze bouz lo en sistenm *on-line* pou prosedir kourye. Sa, pou atraver lasistans ki Gouvernman pe benefisye anba led Devlopman Eropeen. Nou pou osi aplik Lalwa ki regulariz bann kourye pou mandate ki se zot ki fer tou prosedir pou zot kliyan, parey i ete partou dan lemonn. E sa i vedir ki sa bann kourye a perform servis *door to door* ki zot kliyan in peye.

Pandan lannen 2022 nou ekspekte met en program pou *authorised economic operators*. Sa program i pou fasilite bann enportater e eksportater ki swiv byen zot bann prosedir pou ganny en servis pli vit. Nou pou bezwen fer lamannman dan bann regilasyon neseler e osi donn formasyon bann zofisye Ladwann pou kapab enplimant sa program.

Mr Speaker, an si konsern bann lezot travay ki Gouvernman pe fer lo *ease of doing business*, mon kapab anons sa bann linisyativ swivan;

1. En Komite *High Level Domestic Regulations*

Committee (HLDRC) ki group reprezantan sektè piblik e osi Manm Lasanble Nasyonan ti ganny formen. Sa komite i regard bann fason amelyor bann prosedir administrative *licensing*, sirtou konsènan bann biznes ki enplik investiser etranze.

Alor travay sa Komite, se pou adres bann prosedir biznes ki bann etranze i angaz zot ladan pou asire ki tou i kler e bann Lorganizasyon parey *SIB*, *SLA* e lezot i kapab tret en laplikasyon avek plis transparans e lefikasite.

2. Gouvernman pe travay pou redwir lakantite letan ki Biro Lenvestisman *SIB* i pran pou donn *feedback* e pou senplifye bokou zot bann prosedir fasilite.
3. *SIB* in enplimant en sistèm nimerik, *customer relations management*. Sa i en sistèm ki anrezistre e fer swivi lo laplikasyon ki vin kot *SIB* pour ki zot kapab donn en pli bon servis lenvestiser.

4. Gouvernman pe travay lo en sistèm nimerik ki pou entegre tou fonksyonman bann Lazans, ki i ava annan en sel *portal* ki resevwar tou laplikasyon biznes *online*.
5. Gouvernman pe osi fer diskisyon avek bann partner konsènen, pou devlop en fason *licensing* ki kapab annan en lankadremman bann biznes ki napa en striktir fizik, ouwa en ladres permanan, sa ki fer biznes *online*.
6. Gouvernman pe osi evalye bann diferan prosedir e standar bann antite pou retir bann diplikasyon e senplifye prosedir ouver en biznes san konpromiz lizyenn e sekirite imen, propriyete e lanvironnman.

Mr Speaker, nou rekonnèt travay ki nou pe fer pou ogmant krwasans dan lekonomi, me i bezwen osi ganny konplimante avek travay dan lezot sektè. Se pour sa rezon ki nou pe travay avek Zidisyer pou nou annan en Lakour spesifik ki kapab donn sa latansyon lo bann ka ki annan pou fer ek komers.

Dan bokou lezot pei zot apel li en *Commercial Court*. Nou bezwen konmans sa diskisyon e vwar pli bon fason pou adres sa bann defayans.

15. Sekter Lanvironnman, Lenerzi e Sanzman Klima

Mr Speaker, dan bann lannen ki vini Gouvernman pou enplimant en plan nou bann kontribisyon nasyonal, ki en plan stratezik anbisye ki ti ganny finalize an Zilyet sa lannen.

Sa plan i annan bann target spesifik ki nou bezwen antreprann pou anmenn progre dan adaptasyon kont sanzman klima dan bann sekter kle parey transport, lenerzi, lenfrastruktir ek lagrikiltir. I osi enportan pour nou met bann mezir pou konbat bann faktor ki afekte nou lanvironnman, tel parey polisyon e osi bann lespes anvaisan.

Laspe ledikasyon, laspe legal ensi ki laspe ranforsman Lalwa, i osi ganny konsidere konman en priyorite, pou asire ki nou kontinyen protez e osi respekte nou lanvironnman.

Pou asire ki nou kontinyen apresye nou lanvironnman, i enportan ki Gouvernman i kontinyen dan

son lalit dan zesyon salte, pou asire ki Sesel i vin pli prop. Sa i tonm byen dan sa plan lonterm pou zesyon salte.

Serten aksyon tel parey ki revizyon bann diferan kontra netwayaz in konmanse, pou asire ki sa bann kontra i vin pli efikas e finansyerman soutenab.

Partisipasyon Sesel dan *COP26* in annan plizyer diskisyon avek bann partner lo ki fason Sesel i kapab akse finansman pou enplimant son stratezi lo adaptasyon sanzman klimatik.

16. Sekter Transpor

Mr Speaker, Sekter Transpor pou lannen 2022 pou kontinyen met lanfaz dan amelyorasyon dan lenfrastruktir e osi anmenn plis kontribisyon pou kre plis loportinite lanplwa dan lekonomi e osi anmenn plis reveni dan Sesel. Sa Sekter in ganny en alokasyon R179 milyon dan Bidze 2022. Sa alokasyon pou kontinyen ed sa sekter dan son plan devlopman pou amelyor semen dan plizyer distrik e osi son plan pou re sirfas bann semen.

Bann proze e programm prensipal i *comme swivan*;

- i. Amelyor ron pwen *roundabout* Plaisance - R4.8 milyon
- ii. Elarzi semen Bois De Rose - R4 milyon
- iii. Konstriksyon en nouvo ron pwen pres kot *aboutik Weeling* pou amelyor sirkilasyon trafik - R1.5 milyon
- iv. Premye faz pou en *trwazyenm lane Point Larue* - R5 milyon
- v. En Bidze R2.7 milyon pou kontiny semen Pasquere
- vi. R8 milyon pou en stasyon pou teste bann veikil lo Praslin
- vii. R9.4 milyon pou met nouvo lalimyer lo bann semen e R8.7 milyon pou amelyor bann lalimyer ki egziste ozordi
- viii. R38.3 milyon pou met koltar e re sirfas bann semen
- ix. R11.2 milyon pou repar semen tel ki bann drenaz e lezot lenfrastruktir semen ki'n andomaze
- x. R18 milyon pou prokir koltar

17. Sekter Ledikasyon

Mr Speaker, Minister Ledikasyon i reste angaze avek son nouvo direksyon stratezik anba tenm: *Lev laspirasyon e fer ki rezilta laprantisaz i vo lapenn*. Gouvernman i rekonnèt ledikasyon koman enn son bann domenn priyoriter e resours pe ganny mete pour ki sa Minister i akonplir son bann gran plan. En total R1.03 bilyon pe ganny mete pou lannen 2022.

Sa Minister pou zwe en rol stratezik dan devlopman lekonomi nimerik. An kolaborasyon avek Minister Lenvestisman, Lantreprenarya e Lendistri, sa Minister pou komans entrodwir bann etidyan avek sa konesans finansyel, biznes e nimerik dan en fason pli striktire.

Lobzektif prensipal se promouvwar en program skoler ki azour e relevan dan tou sans.

Dan menm laliny, Gouvernman pou siport plan ledikasyon an se ki konsern modernizasyon e transformasyon. Minister Ledikasyon pou revwar son *curriculum* e i pou enkli lenformasyon teknolozi konman en size.

E sa Minister pou osi revwar fason lansennyman

atraver bann platform nimerik e nouvo teknolozi.

Gouvernman pe travay avek Sekter Prive pou ofer *WIFI* dan lekòl. Sa servis pou osi aksesib pou bann zanfan ek ansennyan kot lakour pou zot akse bann platform edikasyonnel.

Anliny avek annan en sistenm ledikasyon pli enklisiv, Minister Ledikasyon ek son bann partner pou vwar posibilite modifye fasilite dan omwen enn ou de lekòl, ki a kapab komans resevwar bann etidyan otreman kapab.

Minister Ledikasyon in deza enkorpor lekòl pou bann dimoun ki annan problemm tande dan son portfolyo e demars pe ganny fer pou enkli lekòl pou bann zanfan Otizm.

Mr Speaker, Gouvernman, pe fer en alokasyon Bidze pou en total R202 milyon pou bann labours. Me nou rekonnet nou ganny osi bann labours avek nou bann partner. Alors i enportan ki nou bann etidyan i servi sa bann loportinite.

Dan Bidze 2022, nou pou travay avek bann labank komersyal, pou nou met en striktir an plas pou donn en sibvansyon lo to lenterè ki ganny sarze lo bann *loan* ki ganny donner pour letid. Sa bann to lenterè ki pou ganny

sibvansyonnen pou bezwen dan bann domenn priyoriter. En total R8 milyon pou sibvansyon to lenterè lo bann *loan* etidyan in ganny mete dan Bidze 2022.

Gouvernman in osi fer en alokasyon R5 milyon anver Liniversite Sesel pou renovasyon son batiman e osi pou devlopman son bann program ek bann Liniversite Enternasyonal.

18. Sekter Lanplwa

Mr Speaker, Gouvernman i touzour reste angaze pou ed nou bann frer ek ser ki pe rod en lanplwa. Sa ki bon note, se ki malgre 1,400 Seselwa ti perdi zot lanplwa atraver *redundancy* ant Zanvye 2020 e Septanm 2021, nou vwar ki ti annan 4,527 *vacancies* zis pou Zanvye ziska Septanm 2021 lo marse lanplwa.

Sa krwasans dan lekonomi ki nou pe eksperyanse in kree loportinite lanplwa pou Seselwa ki anvi en travay.

Dan Bidze 2022, provizyon in ganny fer pour R5 milyon dan program *skills development* e *My First Job*. Alors Mr Speaker, i enportan ki Gouvernman i kontinyen met an plas bann mezir e adopte

bann stratezi pou amelyor bann *skills* ki lekonomi i bezwen.

Enn sa bann premye mezir ki Gouvernman in pran, se pour ki Minister Lanplwa e Zafer Sosyal ek Minister Ledikasyon i angaze dan en konversasyon pou propoz ek Gouvernman en nouvo Polisi lo Devlopman Resours Imen dan pei.

Sirtou an sa ki konsern bann *skills* ki an gran demann lo marse lanplwa. Sa konversasyon i an progre e byento nou pou anons bann mezir ki pou ganny pran. Sa travay pou bezwen ganny fer konzwentman avek Departman Planifikasyon Ekonomik pou asire ki i anliny avek nou plan devlopman nasyonal. Nou ekspekte sa travay i konplete dan 2022.

Mr Speaker, dan serten Sekter e serten biznes i ankor tro difisil pou bann Seselwa profesyonnel ganny loportinite dan bann pozisyon egzekitiv. Nou annan Seselwa ki kapab, kalifye e devoue ki merite sa bann pozisyon egzekitiv.

Pou asire ki tou antite i donn Seselwa en sans pou ganny sa bann pozisyon, Gouvernman pou met an plas en lankadremant *GOP* pou asire ki bann lorganizasyon i ganny ankouraze pou donn formasyon

pou donn sa sans ek loportinite sa bann Seselwa. Bann konsiltasyon e evalyasyon sa lankadremant pe kontinyen e i ekspekte ki ver le 01 Avril, sa nouvo lankadremant *GOP* pou vin an fors.

19. Gouvernans dan Lantrepriz Piblik

Mr Speaker, nou bann lantrepriz piblik i bezwen annan plis lefikasite dan zot performans e minimiz okenn risk ki zot kapab anmennen lo Bidze. Pour lannen 2022, Gouvernman in fer en alokasyon *comme* swivan ;

- i. R149 milyon anba sibvansyon pour bann lantrepriz piblik konpare avek R248.2 milyon an 2021. Dan sa sonm :
 - a. Servis Lapos pou ganny en alokasyon R8 milyon
 - b. *SPTC* en alokasyon R28.2 milyon
 - c. Lotorite *Park e Zarden* - en alokasyon R7.3 milyon e
 - d. Gouvernman pe osi fer en alokasyon R95.5 milyon avek *Air Seychelles* pou pey det ki sa lakonpanyen ti annan avek *Etihad*

- ii. I osi annan R169.1 milyon anba bann don devlopman pour bann lantrepriz piblik e ladan :
 - a. *SPTC* pou ganny en alokasyon R46.3 milyon
 - b. *PUC*, 60milyon.
 - c. *PMC* pou ganny en alokasyon R62.8 milyon
- iii. Anba *Net Lending*, *PUC* pou ganny R264.6 milyon

Mr Speaker, Gouvernman in aprouv Prozedlwa Lantrepriz Piblik e nou ekspekte ki sa i ganny prezante devan Lasanble Nasyonal boner 2022. Sa nouvo Lalwa pou fer sir ki i annan bann nouvo obligasyon ki bann lantrepriz piblik pou bezwen swiv, e ava ed Komisyon ki siperviz bann Lantrepriz Piblik (*PEMC*) fer son sipervizyon dan en fason pli efektiv.

An sa ki konsern *STC*, mon kapab dir nou'n vwar en performans remarkab dan sa lakonpanyen apre 8 mwan ki sa nouvo *bord* ti ganny apwente. *STC* pe ekspekte fer en *savings* R40 milyon pour lannen 2021.

Kanpanny *RRP STC* in redwir pri par 7 poursan dan bann

komodite dan kategori 1. *STC* osi in konstate ki son bann pri i 33 poursan pli bon marse konpare avek bann lezot laboutik.

Zis pou donn enn de legzanp;

- i. *Premium* Diri Basmati i kout R29 per kilo konpare an mwayenn R38 dan bann lezot laboutik
- ii. *STC* delwil '*Sunflower*' i kout R23.75 konpare an mwayenn R41 dan bann lezot laboutik
- iii. *STC* '*Powdered Milk*' i kout R32 konpare an mwayenn R44 dan bann lezot laboutik

Avek logmantasyon ki pe arrive dan kou transportasyon marsandiz, *STC* pe zwe son rol pou fer sir ki napa ogmantasyon dan pri komodite dan kategori 1. Me nou rekonnèt i annan plis ki nou bezwen fer e *STC* pou kontinyen met plis zefor pou negosye bann pli bon pri avek son bann fournisseur e pour li kapab pas sa benefis avek popilasyon.

20. Konklizyon

Mr Speaker, ozordi mon'n dir bokou keksoz, me konman en pep nou bezwen kontinyen ede dan devlopman nou pei.

Nou bezwen vwar ki mannyer koman sak endividi nou kapab fer nou bout pou anmenn plis larises pou Sesel e osi pour nou fanmir.

Avek sa nouvo lapros, lobzektif Gouvernman i pou asire ki nou bann bi ekonomik a long term pa zis ganny atenn, me enn ki larises i ganny partaze atraver en sistenm ekitab e soutenab.

Koman en Gouvernman responsab, nou bezwen asire ki bann zenerasyon a lavenir i benefisye avek bann sakrifis e sanzman nesaser ki pe ganny fer ozordi.

Sa pandemik in montre nou koman en pei nou bezwen aprann e aplik sa bann leson dir, me nesaser aköz nou pli gro defi a lonterm, sanzman klima, i enn ki nou bezwen pare pour fer fas avek sirtou si nou anvi sirviv koman en Nasyon.

Seselwa i bezwen konstate ki sa pandemik COVID-19 pa ankor kit nou. Alors nou bezwen reste pli vizilan. Me, toudmenm, mon oule remersye tou Seselwa, ki'n ekoute e konpran sa lapel pou sov nou pei. Zot sakrifis ki zot pe fer i pa pou anven. Sesel i ankor bezwen tou son zanfand dan sa moman difisil.

Pour ou ki'n al debourye, pour ou ki'n kontinyen travay,

pour ou ki'n kontinyen gard ou biznes an operasyon e pour ou ki'n vin inovativ pandan sa moman difisil, mon dir zot tou mersi pour zot patriyotizm ki zot in montre anver nou pei.

Mr Speaker, mon oule remersye Prezidan Ramkalawan pou sa premye lannen travay dir e son vizyon pou batir sa fondasyon pou konmans sa transformasyon ki nou bezwen dan Sesel.

Mon ti a kontan osi remersye mon bann koleg Minis e zot lekip dan bann Minister, Departman e Lazans pour zot sipor pandan lannen 2021 e osi dan preparasyon Bidze 2022.

Mon remersye mon *staff* dan Minister Finans, Planifikasyon Ekonomik e Komers e tou bann Lazans ki tonm anba mon portfolyo pour zot travay lekip, zot profesyonnalizm ek zot motivasyon pou anmenn lekonomi Sesel o pli o nivo.

Mersi osi, tou manm Lasanble Nasyonal, e ou osi Mr Speaker. Ankor enn fwa, mon ti a kontan remersye pep Seselwa, Sekter Prive ek sosyete sivil pour zot konfyans dan direksyon ekonomik ki nou pei in pran.

Avek Sa, Mr Speaker, mon rekomande ki sa, *Appropriation Bill 2022* pou en Bidze

R10,091,651,146, pou otoriz depans dan *Consolidated Fund* pour lannen 2022 i ganny aprouve. Mersi, Mr Speaker.

(APPLAUSE)

MR SPEAKER

Mersi. Mersi Minis pou ou prezantasyon. Mersi bann Manm pou zot latansyon. Nou pou *adjourn* pou ozordi, nou pou rebran travay Mardi le 16 Novanm, 9er bomaten pou komans repons lo *Appropriation Bill, 2022*, Komansan par repons bann *Leaders* dan Lasanble.

Mon a dir zot *bonne journée*. Lazournen i ankor long. *Bonne journée* e nou a rezwenn semenn prosenn. *Adjourn*.

(ADJOURNMENT)